



Nuuk 4. februar 2016

Inatsisartut suleriaasianni § 37 naapertorlugu Naalakkersuisunut imaattunik apeqqute-qarpunga:

- 1. Ilinniagaqalernissamut piareersarnermut pikkorissartitsinermi peqataasut ulluinnarni GU pilot-mik taaneqartartumi, aasaru 2016-mi naammassisussat, assersuutigalugu ukiaru Ilinniarfissuarmut, ilinniaqqiffinnullu allanut ilinnialernissaminnut qinnuteqaraluarlutik inissaqannginnertik pissutigalugu tiguneqanngitsoortut aappaagu qinnuteqaqqissinnaanissaat Naalakkersuisut qulakkeersinnaavaat?**
- 2. Ukiormanna tiguneqanngitsoortoq aappaagu aamma tiguneqanngitsooruni taanna aningaasanik asuli atuilussinnarnerussannginnerpa?**
- 3. 23-leereersimasut ilinniarnertuunngorniarfinnilu atuarsimangitsut, qaffasinnerusumilli ilinniagaqaleqqikkusussinnaasut, qaffasinnerusumik ilinniagaqaleqqissinnaanissaat aqutissiuunniarlugu Naalakkersuisut qanoq pilersaaruteqarpat? GU-ip saniatigut.**
- 4. Ilinnialeqqinnissamut Piareersarfik HF qangaanerusoq nunatsinni ingerlanneqartarnikuusoq aallarteqqinniarlugu Naalakkersuisut pilersaaruteqarpat?**
 - A. Aap-piuppat qaqugu?**
 - B. Naamiuppat sooq?**

(Inatsisartuni ilaasortaq Peter Olsen, Inuit Ataqatigiit)

Tunngavilersuutit

Naluneqanngitsutut Ilinniagaqalernissamut piareersarnermut pikkorissartitsisarneq, ulluinnarni aamma GU Pilot-mik taaneqartartoq, inersimasunut 23-leereersimasunut GUX Nuummi GUX Aasiannilu ingerlanneqartarsimasoq unitsinneqassaaq aasaq 2016.

Naluneqanngitsutullu Ilinnarfissuup aamma Ilisimatusarfiup ilinnialertussanut piunasaqaatitik ukiumiit qaffattussanngorlugit nalunaaruteqarnikuupput. Tamatuma kingunerusussaava ukioq manna GU pilot-mik atuartut ukiormanna tiguneqanngitsoorunik aappaagu tiguneqarnissartik ilimagisinnaajunnaarpat, piunasaqaatit sakkortusarneqarnerata kingunerisaanik.

Naluneqanngitsutut 23-leereersimasut aammalu inuussutissarsiornermik ilinniagaqareersimasut qaffasinnerusumillu ilinniagaqaaqqilersuusinnaasut qujanartumik amerliartorput. Inuuneq tamarmi ilinniarfiummat ilinniarnerminni nalaanni aammalu ilinniareersimanerni kingorna sulineri ilikkagarpassuaqalersarput misilittagarpassuaqalersarlutillu ilinniaqqinnissaminnut atorluarsinnaasaminnik.

GU tassaavoq ukiuni pingasuni ilinniarnertuunngorniarfik inuusuttuaqqanut 16-iniit 18-nit tungaannut ukiulinnut naleqqussagaasoq.

Taamaattumik naleqquppallaangilaq 23-leereersimasumut inuussutissarsiornermillu ilinniagaqareersimasumut ukiuni pingasuni ilinniarnertuunngorniarfimmi, inuusuttuararpassuillu akornanni qaffasinnerusumik ilinnialeqqinnissamut piareersassalluni.

Taakkununga naleqqunnerpaaq tassaagunarpaq ukiuni marlunni ilinniaqqinnissamut piareersarfik; tassalu qallunaatut taaneqartartoq HF.

Ilinniartitaanerup qaffassarneqarnissaa pingaartipparput aamma nunatta ilinniarluarsimasut pisariaqartippai. Taamaattumik pingaaruteqarpoq inersimanagerusunut qaffasinnerusumillu ilinnialeqqikkusussinnaasunut piareersarfiusinnaasumik peqarnissarput GU-ip saniatigut.

GU pilot-ip atorunnaarneratigut inersimanagerusut ilinniaqqiffissaannik amigaateqalertussanngorpugut. Taamaattumik apeqquteqaatinni aamma paserusukkiga inersimanagerusunut ilinnialeqqikkusussinnaasunullu naalakkersuisut qanoq pilersaaruteqarnerusut GU-ip saniagut.

Taamatut tunngavilersuuteqarlunga matumuuna apeqquteqaatiga ingerlateqqippara.

Kissaatigaaralu apeqqutima ullut suliffiusut qulit iluanni akineqassasoq.